

Draamahárjuttâsâh

Váaldus oppâcáittusist

Muttim ootsis oovce draamahárjuttâs Piäju¹ táárbuh jurduin. Algâalgâliih hárjuttâsah lijjii uáiviääsist must muštoost, mutâ motomijd kavnim kirjeest Iloa ja leikkiä (Karvonen, P. 2009). Čuáuvuvâžžân oovdânpuávtám hárjuttâsâid, maid Piäju várás vuávájim. Hárjuttâs noomâ maaja lii ruáhij siste tot kielâoppâässhi, teikkâ eres kielân lahtâseijee ässhi, mon sierâdem pehti hárjuttâlleh.

Joo-sierâ (maaŋgâiloho)

Stivrejeijee aalgât utkâmâin om. "Lep poccuuh", moos puohah västideh "Joo!" Puohah čaittâleh poccuid nuuvt kuhhâá ko kiinii utkâ čuáuvuvâá, mon puohah čaittâleh. Ain ko kiinii iävtut te iärrâseh huikkeh "Joo!"

Maainâshippa (sämmilâš mainâselleigijn já imelijgijn)

Nelji eres fiiguur: Stáalu, Pieggâalmai, Čähâlig ja Kooniš

Stivrejeijee koijâd, tobdeh-uv päärnih magareh figuureh taah láá. Talle oovtâst otkeh maht toh lihâdeh. Puohah ferttejeh lihâdiid siämmâánâál. Hippa uážžu meridiid magareh figuureh láá já ko páácá hippan te čuárvu om. "Stáalu!", kuás puohah lihâdeh Stáalu náálá. Hippa-sierân puáhtâ väldiid ain lase figuuriid. Sierâ uáivitárkuttâs ij lah kištottâllâd peic sierâdem pehti uápasmud sämmilâš mainâsfiguurâid (Mainâshippasierâ algâalgâlâš nommâ lii oliohippa, mutâ jiem kaavnâm sämikielâg västideijee saánán "olio". Lasseen jiem haalijd kevttiid olio-sääni ovdâmerkkân Pieggâalmast, mii lii sämmilâš immeel).

Liäiboosierâ (akkusatiiv, genetiiv, duaal, pákkumhäämi)

Stivrejeijee lii liäiboo, ohtâ teikkâ kyehti párnâin išeliäibooth. Loppâuasi párnâin lii nisutäigi. Sierâ álgâ ko liäibooth puátih iđedist toolâá paargon, kavâstâlleh já cokkiitih čuovâ. Eres päärnih láá taan puudâ raddalâsâst "ilddest" amnâsin. Liäibooth rähtiškyettih täägi já pieijih amnâsijd ohtâ häväild stuorrâ mielâkuvviittâsnâápán já siävutteh täägi kiedâigijn. Stivrejeijee koijâd párnâin, maid tááigán pieijâd já addel ravvuid "Leškii mielhi", "Keigiiččih-uv sukkâr", "Piäijup/Pieijâd vala kaaneel" jna. Ko täigi lii vaalmâš, tom jyehih pittâid já jyehi päärnist rähtih jieijâslágán niisu. Liäibooth hämmejeh, hervâtteh já vyeidih niisuid já loopâst vala keessih juolgijen stuorrâ uuvnâñ. Valmâš nisuid pieijih vala mučis raddâlâsân faallâmnâálá. Taan sierâ stivrejeijee puáhtâ stivriid já molsod mielâ mield. Tehálâš lii kuittâg toollâd "laigijd kiedâst" amas sierâst šoddâd almolâš moive.

Juávhui hammim (numereh, maaŋgâiloho, rummâšjesaneh, pákkumhäämi)

Stivrejeijee piäjâ muusik čuoijâd já päärnih uážžuh lihâdiid rijjâ muusik fáárust. Ko muusik jaska, stivrejeijee râđđee hammid jieškote-uvlágán juávhuid, ovdâmerkkân: "Pieijâd kulmâ uáivi/vittâ kiedâ/ovce pelgid jna. oohtân". Teikkâ "Uusâ skippâár, kiäst lii siämmâáivnásâš päidi/siämmâálágáneh suhâh/siämmâákuheh vuoptah jna. ko tust". Teikkâ elleigijn, kuás päärnih uážžuh čaittâliid elleid: čiččâm kyellid/kulmâ kisá/kyehti poccuu oohtân jna.

Čalmettes eennâmviljâleijee (elleeh, maaŋgâiloho)

Juávhust väljejeh oovtâ eennâmviljâleijee. Suu čoolmijd čaneh já sun čuážžu kyevti stoovli kooskâst, mii lii porttâ. Jyehi pärni meerrid mielâstis, mii elleid lii, mutâ ij uážu ettâd tom jienâñ. Stivrejeijee piälján puáhtâ pullâgyettiid. Eennâmviljâleijee koččo elleid om. "Puoh kisâh teehin", kuás juáhâš, kote lii meridâm leđe kissâ, keččâl njaahâd "poortist" siisâ nuuvt, ete eennâmviljâleijee ij kuulâ já fattii kiddâ. Kuoskâttâsâst páácá kiddâ já ferttee maccâd maasâd. Sierâ juátkoo nuuvt kuhhâá ko puoh elleeh láá peessâm poortâst čoodâ teikkâ tassaaš ko oovtâst meriduvvoo, ete sierâ nohâ.

¹ Anarâškielâ kielâpiervâl

Siähálásnuškomstillih² (adjektiivih, maŋgâiloho)

Stivrejijee piäjá muusik čuoijâd já päärnih užžuh tánssád já lihâdiđ rijjâ. Ko muusik nohá, ferttee stergâgiđ sajasis. Stivrejijee väljee oovtâ párnain, kii uážu leđe ”äššitobdee” já koijâd sust om, maid sun uáiná? Stivrejijee puáhtá meiddei utkâd jotkâkoččâmâšaid já molsođ sierâ om. jis ličcijm elleikäärdist, taaidâčáitâlduvvâst, puásuikäärdist jna.

Jis tun lah, te mun lam (assosiaatioh)

Vuosmuš aalgât, mana ”luáván” já iätá om. ”Mun lam muorâ”, Čuávuvâš mana já iätá ”Jis tun lah muorâ, te mun lam _____” (utká jieš). Návt juátkih tassaaš ko puohah láá siämmáá kooveest. Sierâ puáhtá juátkiđ ovdâmerkkân nuuvt ete juáháš puáhtá jienâdiđ teikkâ kove puáhtá liihâdškyettiđ. Sierâ puáhtá juátkiđ meiddei nuuvt, ete tolebiššáá luáván puáttám pärni máccá kečcei juávhun, kuás kove muttoo ubâ ääigi.

Pantomiumärvädâsah (veerbah)

Stivrejijee čáittá oovtâ párnán koortâ, mast lohá verbâ já lii kove ton tooimâst. Pärni čaittâl koortâ tooimâ já iärráseh kečçaleh ervidiđ, mii veerbâid lii koččâmâsâst. Ko láá ervidâm veerbâ te koortâ kove čäittih vala puohháid.

Roppâpustuveh (pustuveh uápisin)

Stivrejijee piäjá muusik čuoijâd, kuás päärnih pyehtih lihâdiđ rijjâ. Ko muusik jaska, stivrejijee čáittá mottoom puustuv já ciälkkâ tom, kuás päärnih hämmejeh jieijâs roopâst puustuv. Taam puáhtá porgâđ meiddei parâluvâi teikkâ juávhust.

Heli Huovinen

Teatter-olgospyehtim stivrejijee

² still = pisánâm kove